

և արագ-արագ վազում է աջ ու ձախ, որպէս զի ամեն բանին հասնելու հնար ու միջոց ունենայ: Այս դեռ ոչինչ է: Սակայն անտանելին այն է, որ ընտանիքի տղամարդը լինի իւր ամուսինը, կամ նրա փոքր եղբայրը (տագրը) դաշտից տուն եկաւ թէ չէ, հարսը պարտաւոր է նրա ոտքերը լուանալ կոնքի մէջ սառը ջրով: Նրա ձեռքերին ջուր լցնել և ձեռարբիչ տալուց յետոյ կայծակի արագութեամբ վազել դէս ու դէն, որպէս զի նրա համար կերակուր և հաց բերի: Աստուած մի արասցէ, եթէ հարսը մի փոքր ուշ բերի կերակուրը, կամ բերած ափսէների շարքում յանկարծ ազը կամ սղոպեղը մոռացած լինի և կամ հէնց մածնի, կամ կերակրի ու հացի մէջ մի մազ երևայ, այն ժամանակ վայն է եկել այն դժբախտ հարսի գլխին: Տղամարդը կատաղի առիւծ է դառնում, գոռում, գոչում է խեղճ ու անօգնական հարսի վրայ, կարկտի պէս զզուելի հայհոյանքների հեղեղներ է թափում նրա հօրն ու մօր հասցէին: Իսկ երբեմն էլ լինում են այնպիսի անհամբեր և կատաղի արարածներ, որոնք առանց երկար ու բարակ մտածելու, ինչ որ իրենց ձեռքն է ընկնում, լինի պղնձէ կամ հողէ աման, քար ու փայտ շարտում են հարսի վրայ, որից շատ անգամ նրա մարմնի զանազան մասերն է կապտում, իսկ շատ անգամ էլ նրա կողերն է ջարդւում, որով կատարելապէս խախտում է նրա առողջութիւնը: Դիմադարձութիւն անել, պատասխան տալ, կամ այսպիսի անխիղճ հարուածի մասին որեւէ ձայն ու շշուկ հանել, երբէք չի կարող անխօս և կա-